



XUNTA DE GALICIA
 PRESIDENCIA
 Secretaría Xeral para o Deporte

Estadio Multiusos de San Lázaro
 15781 SANTIAGO DE COMPOSTELA
 Tfno: 981 542 601/02 - Fax: 981 542 636
 E-mail: secretaria.deporte@xunta.es



Data 16/3/2015					
<p>Asunto</p> <p>ENVIO RESOLUCIÓN EXPTE 5/2015</p> <div style="border: 1px solid black; padding: 5px; margin: 10px 0;">  <p style="text-align: center;">1 8 MAR. 2015</p> <table border="1" style="width: 100%; border-collapse: collapse;"> <tr> <td style="padding: 2px;">ENTRADA</td> <td style="padding: 2px;">SAIDA</td> </tr> <tr> <td style="padding: 2px;">N.º 247</td> <td style="padding: 2px;">N.º</td> </tr> </table> </div>	ENTRADA	SAIDA	N.º 247	N.º	<p>Destinatario</p> <p>Pdte Federación Galega de Automobilismo Crtra de Vigo, 43, baixo O Pino 32001 Ourense</p> <p>REXISTRO XERAL DA XUNTA DE GALICIA REXISTRO DA SECRETARÍA XERAL PARA O DEPORTE SANTIAGO DE COMPOSTELA</p> <p style="text-align: right;">Data 16/03/2015 16:54:37</p> <p>SAÍDA 335 / RX 338716</p> 
ENTRADA	SAIDA				
N.º 247	N.º				

Como Secretaria do Comité Galego de Xustiza Deportiva, remítole RESOLUCIÓN ditada por este Comité.

XUNTA DE GALICIA
 Comité Galego de Xustiza Deportiva
REXISTRO XERAL
 SAIDA 167
 ENTRADA _____
 DATA 16 - 3 - 2015



En Santiago de Compostela, a 16 de marzo de 2015, reunido o Comité Galego de Xustiza Deportiva en sesión plenaria celebrada o día da data, resolveu o recurso RN 5/15, interposto a partir de escrito presentado por D. **J.CH.A.**, polo que recorre contra a resolución do Tribunal Galego de Apelación da Federación Galega de Automobilismo (en adiante F.G.A.), de data 27 de novembro de 2.014, que resolveu sancionar ao interesado e a outro deportista ca sanción de privación de licenza deportiva durante dous anos.

ANTECEDENTES DE FEITO

PRIMEIRO.- Con data 13 de xaneiro do 2015 tivo entrada, no rexistro do Comité Galego de Xustiza Deportiva, escrito presentado por D. **J.CH.A.**, en virtude do cal interpón recurso contra a resolución de 27 de novembro de 2014 citada polo Tribunal Galego de Apelación da F.G.A. pola que se lle impón unha sanción de privación de licenza deportiva durante dous anos, por uns feitos acaecidos durante a disputa da proba do Autocross O Castro 2014, Semifinal A de kartcross, celebrada en data 11 de outubro de 2.014 en Rianxo (A Coruña).

No escrito de recurso solicitábase tamén a suspensión cautelar da execución da sanción recorrida.

SEGUNDO.- Mediante Providencia de data 19 de xaneiro do 2015 este Comité Galego acordou admitir a trámite o recurso presentado contra a mencionada resolución do Tribunal de Apelación da F.G.A., co número de expediente 5/2015, e dar traslado ao Presidente da mesma para que, por quen correspondese, no prazo de dez días dende a recepción de dita providencia remitira expediente e informe.

En canto a suspensión cautelar solicitada, deuse tamén traslado a F.G.A. por un prazo de tres días para que emitira informe en relación a mesma, segundo o establecido no artigo 46.3 do Decreto 120/2013 polo que se aproba o Regulamento deste Comité.

TERCEIRO.- Con data 2 de febreiro do 2015 tivo entrada neste Comité informe remitido pola F.G.A. en relación a medida cautelar solicitada no que se dicía que a F.G.A. non se opoñía a mesma polas razóns expostas e que constan no expediente. Tendo en conta tal postura federativa e en virtude de outras consideracións, este Comité ditou Providencia, en data 13 de febreiro do 2015, na que acordaba estimar a suspensión cautelar da suspensión da sanción imposta, en tanto non se ditara resolución sobre o fondo do asunto.

A súa vez, en data 4 de febreiro de 2015, tivo entrada neste Comité, o expediente remitido pola F.G.A. cos documentos que obran no mesmo.

CUARTO.- Por providencia de 13 de febreiro de 2015 declarouse concluso o expediente, poñéndoo de manifesto aos interesados, a fin de que, se o entendían oportuno ou necesario, fixeran alegacións finais.



QUINTO.- En data 10 de marzo de 2.015, tivo entrada escrito de alegacións finais do recorrente no que, básicamente, da por reproducidas as alegacións presentadas no recurso de data 22 de decembro de 2014.

Foi designado relator D. **M.J.S.**

FUNDAMENTOS DE DEREITO

PRIMEIRO.- Resulta competente para ditar a presente resolución este Comité Galego de Xustiza Deportiva en virtude do disposto no artigo 87 da Lei 3/2012 do Deporte de Galicia e no artigo 3 do Decreto 120/2013 polo que se aproba o Regulamento deste Comité.

Os feitos que deron lugar a resolución recorrida remóntanse a unha liorta, con agresións físicas e verbais, acaecida durante a disputa da competición do Autocross O Castro 2014, Semifinal A de kartcross, celebrada en data 11 de outubro de 2.014 en Rianxo (A Coruña), entre dous participantes na proba, dunha banda o recorrente Sr. **CH.A.**, e doutra, o Sr. **M.H.**. Este último non recorreu a sanción imposta polo Tribunal de Apelación da F.G.A.

SEGUNDO.- O acontecido nese incidente pódese resumir dicindo que, nun momento do percorrido polo circuito, durante a celebración da proba, os vehículos de ambos participantes colisionaron, provocando que ambos se detiveran en metade da carreira, abandonando o Sr. **CH.A.** en primeiro termo seu kart, para facelo acto seguido o Sr. **M.H.**, mantendo unha mais que censurable confrontación na que interviñeron outras persoas do público, alleas á organización da proba deportiva.

A proba documental consistente en distintas fotografías así coma a grabación en dvd e cd, que obran no expediente, do lance ocorrido son tan claras e gráficas que non se pode menos que concluir que a resolución do Tribunal de Apelación da F.G.A. é non só atinada e axustada a Dereito, se non que o procedemento levouse de maneira impecable por dito órgano disciplinario federativo e as conclusións que alcanza son absolutamente certas e ten que ser compartidas por este Comité. Cumpre incluso sinalar que o castigo puidera ser aínda mais grave para o recorrente, si ben non pode este Comité, en virtude do principio de *non reformatio in peius*, aplicar unha sanción maior ca imposta polo mencionado órgano disciplinario da F.G.A.

TERCEIRO.- Dunha visualización da proba referenciada, en concreto dos vídeos recollidos no cd que obra como documento nº 1 no expediente, cos números VID-20141030-WA0001.mp4, 20141030-WA0002.mp4 e 20141030-WA0003.mp4, sendo este último quizá o mais explícito se ben a vista conxunta dos tres, así como das fotografías que constan no expediente, non deixa resquicio algún as dúbidas, pódese observar que o Sr. **CH.A.** abandona o seu vehículo para dirixirse a un punto concreto onde se atopaba outra persoa, a que todos os interviñentes, incluído o recorrente, identifican coma un irmán do Sr. **M.**, para agarrar o mesmo e derrubalo,



caendo ambos ó fondo dun terreo que estaba en pendente. O recorrente reitera que foi a ese punto do circuito para abandona-lo mesmo, cando é mais certo que tiña outros puntos mais preto e menos perigosos para realizar tal acción, polo que parece evidente que acudiu ó mesmo en procura dunha evitable confrontación que nunca tratou de eludir xa que incluso recoñece, en varias ocasións, que foi alí a pedir explicacións ao espectador que lle increpaba.

Case de seguido, o outro piloto participante implicado, o Sr. **M.H.**, tamén sancionado por estes reprobables feitos, agrade ao Sr. **CH.A** para, a continuación, enzarzarse todos nunha liorta de golpes na que interveñen outras dos persoas, que non resultan identificadas no expediente. E todo isto sucedeu a apenas tres ou catro metros de distancia de onde se atopaba o público, á vista de tódolos asistentes e poñendo incluso en perigo ao resto de participantes xa que o tumulto produciuse durante a celebración da proba e mentres que pasaban outros karts por ese punto do percorrido.

CUARTO.- É por iso que todas as alegacións que fai o recorrente, incluídas as finais unha vez declarado concluso o expediente, non só carecen de fundamento algún, se non que as imaxes e os feitos resultan tan explícitos e contundentes, que non podemos menos que rexeitar tales afirmacións, confirmando ademais o criterio do Tribunal de Apelación da F.G.A. de non estimar a práctica de ningunha outra proba, en concreto a testifical proposta polo recorrente que reproduce ata en dúas ocasións perante este Comité, por resultar absolutamente innecesaria. Nada acredita o recorrente sobre os presuntos precedentes nos que tivo participación o Sr. **M.H.** en expedientes da federación mallorquina. E, en canto ao alegado sobre a vecindade civil e o arraigo social do recorrente na súa localidade que, segundo di, tradúcese nunha ben coñecida afección ó mundo do motor, cumpre sinalar que tales circunstancias deberían servir para esixirlle, si cabe, un maior coidado na súa conduta e no seu comportamento.

QUINTO.- Debemos por último suliñar que temos que facer nosas as atinadas reflexións tanto do órgano disciplinario federativo na súa resolución, que tivo en conta as circunstancias atenuantes axeitadas, algunha das cales invoca ó recorrente, coma as que se recollen no informe federativo obrante no expediente, no senso de manter que resultan lamentables e bochornosos os feitos que tivemos que contemplar e non só para a disciplina do automobilismo, se non para todo o deporte galego en xeral. Tales condutas teñen que ser duramente sancionadas e erradicadas xa que afectan non só aos participantes nunha proba, se non a todos os que interveñen no feito deportivo, ben sexan organizadores, público, patrocinadores, anunciantes, etc. E máxime cando tales feitos tiveron a repercusión, tanto nas redes sociais coma nos medios de comunicación, que recoñecen os propios interesados.

Vistos os preceptos legais citados e demais de xeral e pertinente aplicación,

O Comité **RESOLVE** desestimar o recurso RN 05/15 interposto por D. **J.CH.A**, e confirmar na súa integridade a resolución ditada polo Tribunal de Apelación da F.G.A., de data 27 de novembro de 2.014; e, en consecuencia, deixar sen efecto a medida cautelar concedida no seu momento, consistente na suspensión da sanción.



Contra esta resolución, que pon fin á vía administrativa, poderase interpoñer postestativamente recurso de reposición ante o Comité Galego de Xustiza Deportiva no prazo dun mes contado a partir do día seguinte ao da súa notificación ou interpoñer directamente recurso contencioso-administrativo ante o Xulgado do Contencioso-Administrativo competente no prazo de dous meses contados a partires do día seguinte ao da notificación da mesma, de acordo co establecido nos artigos 116 e 117 da Lei 30/1992, do 26 de novembro, de Réxime Xurídico das Administracións Públicas e do Procedemento Administrativo Común, e no artigo 94 da Lei 3/2012, do 2 de abril, do Deporte de Galicia.

D^a **R.A.G.** , Secretaria do Comité Galego de Xustiza Deportiva:

CERTIFICA:

Que no Pleno do devandito Comité en sesión celebrada o día 16 de marzo de 2015 na cidade de Santiago de Compostela, se acordou a referida resolución, o que lle notifico a Vde. na súa condición de parte interesada para o seu debido cumprimento.

En Santiago de Compostela, a 16 de marzo de 2015.

